

IRSYAD

Soalan

Bolehkah seekor lembu yang dikorbankan diniatkan juga untuk akikah? Contohnya seekor lembu mempunyai tujuh bahagian, empat bahagian untuk korban dan tiga bahagian untuk akikah.

Jawapan

Saban tahun tanggal 10 Zulhijah, umat Islam akan menyambut Aidiladha dan satu keistimewaan sambutan ini adalah ibadah korban dengan menyembelih binatang ternakan yang sah dijadikan korban seperti unta, lembu, kerbau, biri-biri dan kambing.

Ibadah korban adalah amalan yang sangat dituntut dalam Islam bertujuan mendekatkan diri pada Allah Subhanahu wataala bermula pada hari Aidiladha iaitu 10 Zulhijah dan tiga hari tasyrik iaitu pada 11, 12 dan 13 Zulhijah. Firman Allah Subhanahu wataala yang bermaksud:

فَصَلِّ لِرَبِّكَ وَأَنْحَرْ

Maksud: "Maka sembahlah Tuhanmu dan berkorbanlah."

(Surah al-Kauthar: 2)

Selain itu, terdapat juga hadis-hadis Nabi Sallallahu alaihi wasallam yang menjadi dalil akan pensyariatkan ibadah korban. Antaranya sabda Rasulullah Sallallahu alaihi wasallam:

إِنَّ أَوَّلَ مَا نَبْدَأُ بِهِ فِي يَوْمِنَا هَذَا أَنْ نُصَلِّيَ ثُمَّ نَرْجِعَ فَنَنْحَرَ فَمَنْ فَعَلَ ذَلِكَ فَقَدْ أَصَابَ سُنَّتَنَا وَمَنْ ذَبَحَ قَبْلَ أَنْ يُصَلِّيَ فَإِنَّمَا هُوَ لَحْمٌ عَجَلٌ لِّأَهْلِهِ لَيْسَ مِنَ النَّسِكِ فِي شَيْءٍ

Maksud: "Perkara pertama yang kami lakukan pada hari raya ini ialah bersolat kemudian balik dan menyembelih binatang korban. Sesiapa yang melakukan perkara tersebut mereka telah melaksanakan sunnah kami dan sesiapa yang melaksanakannya sebelum solat, maka dagingnya adalah pemberian biasa kepada ahli keluarga dan tidak dikira sebagai ibadah korban".

(Hadis Riwayat al-Bukhari, 968)

Hukum korban ialah sunat muakkad, iaitu sangat dituntut ke atas umat Islam yang berkemampuan dan wajib hukumnya apabila bernazar.

Akikah pula ialah menyembelih binatang ternakan tertentu seperti unta, lembu, kerbau, biri-biri atau kambing sempena kelahiran bayi sebagai tanda kesyukuran kepada Allah Subhanahu wataala. Hukum melaksanakan ibadah akikah adalah sunat muakkad (sunat yang dituntut) bagi yang berkemampuan. Afdalnya dikerjakan pada hari ketujuh selepas kelahiran bayi. Ini berdasarkan sabda Rasulullah Sallallahu alaihi wasallam. Daripada Samurah bin Jundub Radiallahu anhu iaitu:



IRSYAD

الْغُلَامُ مَرَّتَيْنِ بِعَقِيقَتِهِ يُذْبَحُ عَنْهُ يَوْمَ السَّابِعِ وَيُسَمَّى وَيُحْلَقُ رَأْسُهُ
Maksud: "Bayi itu tertebus dengan akikahnya, disembelih akikah pada hari yang ketujuh kelahirannya, diberikan nama dan dicukur rambutnya"

(Hadith Riwayat Tirmizi, 1522)

Seekor lembu mewakili tujuh bahagian sama ada untuk dibuat akikah atau korban. Oleh itu dibolehkan mengambil empat bahagian untuk korban dan tiga bahagian untuk akikah serta memastikan secara jelas korban tersebut untuk siapa dan akikah tersebut untuk siapa ketika penyembelihan. Namun demikian, adalah lebih baik sekiranya ibadah korban dan akikah tersebut dilaksanakan secara berasingan.

